

Канон святому блаженному Павлу Таганрогскому

Тропарь, глас 4:

Отечества Небеснаго възсукя, дом родителей твоих оставил еси. / Тленное богатство мира презрев, / обогатился от Господа многими чудесы и знаменами. / Воздержанием, труды и молитвою наслаждался еси, / образ жития благочестиваго являя. / Темже и ныне с верою приходящим к тебе / во всяцех напастех помогавши. / Блаженне отче Павле, / моли Христа Бога / спастися душам нашим.

Канон, глас 4.

Песнь 1.

Ирмос: Моря чермную пучину, невлажными стопами, древле пешешествовав Израиль, крестообразными Моисеовыма рукама, Амаликову силу в пустыни победил ест.

Припев: Святый блаженне отче Павле моли Бога о нас.

Причастием еже к Богу преподобне, свет был еси, и к Нему отлучився, Павле блаженне, желанием крайним, благим надеждам своим, отче, исполнение приял еси.

Желанием еже к Богу распалаем, мир оставил еси, спутника обрет Христа, отче Павле славне: с Ним же стезю прошел еси спасительную, радуяся.

Обогатится никакоже истощаемыми возжелев, богатство и славу временную мудре, и пищу мимотекущую, и мирское достояние добремудренно отринул еси.

Богородичен: Красную и избранную и всечестную разумев Тя Сын Божий, Пренепорочная, Сын Твой бысть: сыны сотвори благодатию Богородице, чтущия Тя.

Песнь 3.

Ирмос: Веселится о Тебе Церковь Твоя, Христе, зовущи: Ты моя крепость, Господи, и прибежище и утверждение.

Усердно к мысленным совлеклся еси деянием, побеждая вражия полки, пособием Божественнаго Духа.

Ранами и молитвенным воздержанием, преподобне, страсти мирския отче Павле, уязвил еси.

Умори врага блаженный Твой, Иисусе, Павел, умерщвления Твоего Владыко, живоноснаго радостно возжелев.

Богородичен: Избавляющаго человеки преслушания лютаго падения, всему Виновнаго Чистая и Всенепорочная, родила еси.

Седален, глас 5:

Согласием Божественным озаряем, в пути ведущия к Божественным сиянием ходил еси верно, отче преподобне, и врагов отверг прилогов, сын света и дне явился еси, Павле богоблаженне.

Слава, и ныне, Богородичен:

Мати Божия Пречистая, граде христианский, избави люди Твоя от бед прилежно зовущия, и противися врагом гордым мысленным, да вопием Ти: радуйся, Благословенная.

Песнь 4.

Ирмос: Вознесена Ты видевши Церковь на Кресте, Солнце Праведное, ста в чине своем, достойно зывающи: слава силе Твоей Господи.

Соединився стезе правды, в богоспасаемый Божественный град вшел еси, преподобне Павле, спасительным сиянием обогатився.

Единообразный, преподобне Павле, смысл богоносный видев, Божественными повестьями, и Божественною одеждою одеялся еси.

Сердце твое скрижаль очищенну, Святаго Духа благодать обретши, блаженне отче Павле, написа совершенно безстрастие, веру и любовь нелицемерную.

Богородичен: Седяй на престоле превознесенне херувимстем, яко престол Тя имея, Марие Богоневесто, на руках Твоих почи, препрославленный Бог наш.

Песнь 5.

Ирмос: Ты, Господи мой, свет в мир пришел еси, Свет Святый, обращаай из мрачна неведения верою воспеваущия Тя.

Пресветлую зарю, Павле, приим, яко солнце явился еси, и демонскую тьму отгнал еси, достославне.

Твоим желанием, Христе, окрился всепреподобный Павел, желание телесное, якоже изгребие мирское отрясе.

Силою Божественною душу укрепив, в мир вселился еси, опустевая страсти отче богомудре Павле.

Богородичен: Речение преста тленное, Дева бо нетленно роди Бога Слова, паче естества и слова Дева пребывает.

Песнь 6.

Ирмос: Пожру Ти со гласом хваления, Господи, Церковь вопиет Ти, от бесовския крове очищися, ради милости от ребр Твоих истекшею кровию.

Ум твой весь к Богу простирая, непрестанными поучении, плотския любве не пощадел еси, благих тебе ходатайству, Павле, присвоение.

Ни скверны, ни враски приял еси блаженне, посреде тебе мира живущу, частыми же паче мольбами твоими очищаеши от душевныя скверны, притекающия к тебе.

Ты плотских мудрований выше имея помысл, безстрастия одеждою, Павле, одеялся еси.

Богородичен: Усты и помыслы и сердцем, Пречистая Богородице, Тя проповедуем: Тобою Богу примиримомся, отиновеннии преступлением первее праотца.

Кондак, глас 8:

От Небеснаго Врача дар исцелений приим, / разрешаеши болезни наши телесныя и душевныя. / Божественныя благодати столпе от земли до Неба явился еси, / о блаженне Павле, моли Христа Бога спасти град и люди, тебе почитающия.

Икос:

Како возмогу грешный аз, и скверный душею вкупе и телом, исписати еже во плоти сый, равноангельное житие твое, и преславная чудеса; аще убо мнози премудрии не достигнут исповедати многого твоего терпения и смирения, и теплая ко Христу любви, но обаче надеяся на твое беззлобие, о блаженне, сице вопию ти: радуйся, пресветлая звездо, от востока добродетелей возсиявшая и вселенную чудесы озарившая. Радуйся, Христа же Единого, над всеми сущаго Бога, всем сердцем возлюбивый, и Тому невозвратным желанием последовал еси. Радуйся, яко буйственное и юродственное по Апостолу житие избравый. Радуйся, пременимый тленная и настоящая, надежду будущих благих. Радуйся, иже древнему Иову уподобивый терпением. Радуйся, страсотерпче Христов непобедимый, но присно побеждай диавола твоим смирением. Радуйся, иже яко древний он Лазарь нищий, ныне почиваеши в лоне Авраамли. Радуйся, иже по отшествии от мира сего, сущим в бедах и искушениях готов обретаешися предстатель и заступник. Радуйся, везде призывающих тя быстро предворяеши. Радуйся, богомудре Павле.

Песнь 7.

Ирмос: В пещи Авраамстии отроцы персидстей, любовию благочестия паче, нежели пламенем опаляеми, взываху: благословен еси в храме славы Твояе, Господи.

Содержим Христоподобною, отче Павле, Божественною любовию других спасти, радостно весь сам вопия издался еси: благословен еси в храме славы Твояе Господи.

С Небесе тебе поданную отче Павле, прием пищу, сею препитал еси благопокорно приемлющия твоя повеления, и долу влекущий грех оставляющия, блаженне.

Последовав отеческим преданием отче Павле, мудре, ересей бегати злочестивых, заповедал еси зовущим: благословен еси в храме славы Твояе Господи.

Богородичен: Вышняго освященное Божественное селение, радуйся: Тобою бо дадеся радость, Богородице, зовущим: благословенна Ты в женах еси Всенепорочная Владычице.

Песнь 8.

Ирмос: Руце распростер Даниил, львов зияние в рове затче: огненную же силу угасиша, добродетелию препоясавшеса, благочестия рачители отроцы, взывающе: благословите вся дела Господня Господа.

Всесветлая ты был еси звезда, сущия в тине страстей приводя к животу: твориши бо жены нечистыя целомудренно жити, и отгониши лютыя недуги, вопия: благословите вся дела Господня Господа.

Сый цел умом в скрове мудрых чудес преподобне, многая уловил еси юродствовати Господа ради, ведый наругаем бытии, вопия чистейшею душею Павле: благословите вся дела Господня Господа.

Совершен един Господь, иже своих славяй по достоянию, износима тя и гробу посылаема блаженне, ангельскими светлословенными почитает зовущаго: благословите вся дела Господня Господа.

Богородичен: Избавляй нас возсия из Тебе Господь, Дево Чистая, Егоже моли Владычице, просветити поющия Тя, и обстояния нас избавити вопиющих: благословите вся дела Господня Господа.

Песнь 9.

Ирмос: Камень нерукосечный, от несекомыя горы, Тебе Дево, краеугольный отсечеса, Христос, совокупивый разстоящая естества. Тем веселящеса, Тя Богородице величаем.

Всем сердцем Павле, Троице усердно предложився, и от Нея лучи благодетельно прием, световиден был еси, и со Ангелы ликуеши.

Желанием божественным приединився, и воздержанием просвещаем, будущих благ в причастии уже быв, Павле богоблаженне, и в наслаждении.

Твоими болезнями и поты приял еси веселие, никакоже конца имущее: в немже питайся, Павле преблаженне, и нас непрестанно поминай.

Богородичен: Спаси мя рождшая всех Избавителя и Благодетеля, разори души моя облаки, света облаче Святая Владычице, и сильна соделай на страсти борющия мя.

Молитва

О великий угодниче Божий и чудотворче, святой блаженный Павле! Ты, на высоту добродетелей возшед, яко пресветлая звезда житием твоим возсиял еси, и странническое житие избрав, мира сего красная ни во чтоже вменил еси. Темже Всеправедный Судия многими чудесы тя прослави. Душу же твою святую в небесные обители всели, идеже любви Божией наслаждаяся, и наши нужды зриши, прошения слышиши.

Буди нам в недужех целитель, по морю плавающим кормчий и утопающим благонадежное избавление.

Молимся тебе, Павле блаженне: испроси всем, во всякой нужде сущим и ко твоему заступлению прибегающим, всякий дар коемуждо благопотребен: веры и любви преспеяние, благочестия умножение, мира утверждение, больным исцеление, печальным утешение, бедствующим помощь, обидимым защищение. И сподоби ны, угодниче Божий, молитвами твоими благочестно житие земное скончати, Небесное Царствие и жизнь вечную унаследити со святыми, в бесконечныя веки веков. Аминь.